

DE

CAUSA MORTIS

POST

NERVOS VAGOS DISSECTOS INSTANTIS.

—
S C R I P S I T

Carolus Fovelin.


16538

DE

CAUSA MORTIS

POST

NERVOS VAGOS DISSECTOS INSTANTIS.



DISSERTATIO INAUGURALIS

PHYSIOLOGICA

QUAM

CONSENSU ET AUCTORITATE

GRATIOSI MEDICORUM ORDINIS

IN

UNIVERSITATE LITERARUM CAESAREA DORPATENSI,

UT SUMMI

IN MEDICINA HONORIS

RITE SIBI CONCEDANTUR

LOCO CONSUETO PUBLICE DEFENSURUS

CONSCRIPSI

Carolus Fowelin

LIVONUS.



Motto: Felix, qui petit rerum cognoscere causas.

Fing. Georg.

DORPATI LIVONORUM.

TYPIS VIDUAE J. C. SCHÜNMANNI ET C. MATTIESEN.

MDCCLL.

8221
VIRIS

ILLUSTRISSIMIS ATQUE SUMME VENERANDIS

FRIEDRICH HERIBRICH BIEDER

ET

PIERIS USO WALTER

PROFESSOR. LITTERARUM. UNIVERSITATIS D.

PRAECEPTORIBUS suis CARISSIMIS

HAS STUDIORUM PRIMITIAS

PIO GRATOQUE ANIMO

AUCTOR.

Imprimatur

haec dissertatio, ea conditione, ut simulac typis fuerit excusa,
quinque ejus exempla tradantur collegio ad libros explorandos
constituto.

Dorpati Livon., die 3. mens. Maji anni 1851.

Dr. Beichert,
ord. med. h. t. Decanus.

PROEMIUM.

Nervus vagus, ratione majoris extensionis suae anatomicae, i. e. distributionis in tria organa ad servandam vitam gravissima et maxime necessaria, majoris momenti est ad promovendas vitae actiones quam ullus alius. Idecirco minime mirandum est, quod nervus hic jam ex multis seculis ardentissimum Physiologorum studium in se allexerit, et magis maturiusque quam ulla alia systematis nervorum pars innumerarum disquisitionum materiam multarumque controversiarum ansam praebuerit.

Ex viis, quae ad nervorum functiones directe i. e. per experimenta explorandas generatim nobis patent, in hoc nervo praecipue dissectio subligatioque placuit, cum continuatam ideoque secundiorem admitterent observationem, quam quae ex irritatione mechanica galvanicave indeque aucta actione nervorum exspectari potuisset. Quantuscunque vero sit numerus disquisitionum inde ex antiquissimis temporibus ad nostram usque aetatem de effectu dissectionis subligationisque decimi nervorum paris institutarum, quantacunque sit hypothesum ex illis progressarum diversitas, quum literarum conditio cuique tempori propria,

D 17903

perscrutandi auxilia uberioris parciusve obliata, observandi dexteritas et sagacitas plus minusve exulta, ad eandem rem vario immo contrario modo dijudicandam uberem praebarent occasionem, nulla tamen explicatio sufficiens sibique consentiens neque de modo neque de gradu efficaciae hujus nervorum paris aut in organa, quibus illi ramos suppeditant, aut in organismum totum, evalescere potuit. Vel de natura ipsa hujus nervi diu dubitatum est, utrum motorius an sensitivus putandus sit; donec cl. *Volkmann* (*Müller's Archiv.* 1840) numerosis experimentis naturam, quam dicunt mixtam, singularum vagi radicularum ex cerebro exeuntium atque accurate sejunctarum luculenter demonstravit, simulque opinionem a vir. doct. *Scarpa* et *Bischoff*, de analogia n. vagi et accessorii cum nervis medullae spinalis, prolataim falsam esse ostendit.

Una vero hac re omnes sere Physiologi, quicunque huic argumento operam dederunt, inter se consentiunt, dissectione scilicet aut subligatione vagi introque corporis latere facta, mortem utique aliquot diebus post afferri. *Arnemann* igitur et *Sedillot* si contendunt, multa animalia, in quibus periculum esset factum, se vidisse mortem elapsa, adeo alienas res hic adfuisse oportet, ut iste prorsus insperatus rei exitus ad explicandam vagi functionem adhiberi nequeat.

Ubi vero mortis causa esset quaerenda, de hac re inter physiologos convenire non poterat; alii scilicet mortiferam hujus operationis vim disturbatae cordis actioni adscribebant, alii sublatae ciborum concoc-

tioni, alii denique impeditae functioni organorum respirationi inservientium. Exploratio igitur opinionum, quae de causa mortis post vagi dissectionem instantis prolatae sunt, ita quidem ut observationibus a me ipso factis nisus illas vel confirmem vel refutem, huic libello materiam praebebunt.

Cl. *Biddero*, Prof., honoratissimo dilectissimoque praceptor meo, gratias quam maximas mihi agendas esse libenter confiteor, quippe qui consilio liberaliter me instruxerit, atque magnam otii partem in mea re consumserit. Praeterea haud parum debo liberalitati commilitonis carissimi, *Harzer*, qui in apparatu respiratory construendo adhibendoque nec non in analysibus chemicis instituendis amicissime me adjuvit.



Brachet nec non *Valentin*, post vagi irritationem in collo, modo ventriculi contractiones e cardia incipientes animadvertebant, modo stomachum animalium, 6—10 horis post vagi dissectionem necatorum, magnopore dilatatum videbant ab ingestis, quae ex parte non-nisi in exteriore superficie, ex parte plane non mutata erant; animalia enim brevi ante vagorum dissectionem pabulum copiosum acceperant. Contra in omnibus experimentis parallelis eodem tempore sine nervorum laesione factis, concoctio jam plus minus perfecta erat.

E duobus, quae cl. *Bidder* me praesente instituit, experimentis, adferre mihi licet ea, quae faciunt ad rem meam, quibusque disceptatio proposita evidenter decerni potest.

Duobus canibus, in quibus ante 10—14 dies fistula stomachalis effecta erat, nn. vagi in medio collo dissecantur. In altero de continuatis motibus stomachi certiores fieri poteramus ope digitii per fistulam in stomachum inducti, parietesque hujus organi contractant. In altero digitus ob fistulae aperturam angustiorem, aegre quidem inducebatur, tamen etiam in eo non minus copia nobis data erat perspicue videndi, muscularum stomachi contractiones nondum cessasse. Nam tubulus in fistulam immissus ad succum gastricum excipendum, gyros agebat, qui e respirationis motu, assurgentibus et desidentibus ventris parietibus, nullo modo pendebant.

Porro in utroque cane concoctio carnium, tum brevi ante nervorum sectionem, haustarum, tum serius variis temporibus vel per fistulam in ventriculum inductarum vel etiam devoratarum, absque ulla turbatione procedebat; qua de re certiores facti sumus, partim periculis, quibus crebro per fistulam factis ventriculi contenta excipiebamus, partim iis, quae post mortem in stomacho inveniebantur, quippe qui de 150 gramm. carnis, 10 horis ante mortem in ventriculum illatae, residui quidquam nentiquam offerret. Stomachus igitur, quae continebat, manifesto in chymum verterat, et proprio suo motu in intestinum tenue transmiserat.

Si vero secundum experimenta relata constat, regulares stomachi motus in concoquendis cibariis post dissectionem vagorum non esse interruptos, ideoque stomachum hac operatione a centro suo motorio non esse separatum, nihil magis tamquam omnino negari pot-

Caput I.

Ciborum concoctio post nervos vagos dissectos.

Ex observationibus de hac re hucusque institutis, sententiae proveniebant minime sibi constantes. Dum enim alii physiologorum v. c. *Magendie*, *Reid*, ullum intercedere nexus causalem inter n. vagum et stomachi digestionem negant; alii, ut *Baglivi*, *Haller*, *Blainville* etc. dissectione vagi facta digestionem prorsus sublatam videbant, et hanc mortis animalium vulneratorum causam ducabant, alii denique hanc functionem ventriculi saltem retardari animadvertebant, cuius rei causam diversissimis rebus attribuebant.

Ad declarandas autem concoctionis disturbancees, quae nervorum vagorum paralysiu sequuntur, duae tantum rationes inveniri possunt.

1. Paralysis muscularum stomachi.
2. Succi gastrici secretio turbata.
- 3) Impedita digestio oritur ex stomachi parietum paralysi motoria.

Etiam si non assentiamur Jatromathematicis, qui digestionem nihil aliud esse nisi triturationem contendant, fatendum tamen est, contractiones muscularum stomachi multum contribuere ad juvandos chemicos processus concoctionis, quum contactum interiore ciborum sumptorum cum parietibus ventriculi, et ubiorem succi gastrici secretionem producant, nec non efficiant ut chymus in intestinum transeat. Quantum vero pendeant hi motus a n. vago, dubium est inter vir. dd. — *Magendie* enim, *Tiedemann*, *Müller*, *Reid* al. prorsus negant hoc vagi officium, dum e contrario *Bischoff*, *Longet*,

eane non turbata. Nihilominus ad declarandam eam rationes prius dictae sufficere non possunt, sed imminuta haec secretio stomachi alia potius e re continuo enucleanda originem dicit.

Nam carnes non modo et potus, plerumque libenter accepta at cum difficultate conspicua hausta, protinus integra rursus vomebantur, verum etiam nullis alimentis post nervorum sectionem sumtis liquor viscidus et pituitosus aliquoties cum repetito angore ejiciebatur, qui tum reactione alcalica, tum magna cellularum epithelialium membranae mucosae oris copit, meram salivam se ostendebat. Saliva igitur non ut in animalibus sanis glutiendo in stomachum inducebatur, sed potius in oesophago, ejus motus ex nn. vagis pendentes illis dissectis sublati esse dehebant, congereretur eundemque extenderat, donec vehementiore respirationis motu reflexivo ex oesophagi extensi vi in partes vicinas orto; ejiciebatur. Causam vero hujus vomitus remotam, in omnibus animalibus sectis constanter editi, re vera fuisse in oesophago ex nn. vagorum dissectione paralyti affecto, et non in mutata stomachi conditione, partim ex ventriculi per fistulam exploratione directa, partim ex absente omni reactione acida in materiis ejectis, colligere licebat. Cum hac explicatione bene congruit, quod oesophagus animalis mortui flaccidus et dilatatus, vel etiam flavidus liquore repletus reperiebatur.

Quanto vero perfectius oesophago languescente humores impiedebantur, ne in stomachum effluerent, tanto majorem, exhalatione entanea urinæque secretione perdurantibus, liquorum penuriam in corpore fieri oportebat, quae penuria efficere dehebat, ut secretio stomachi, alioquin uberrima et quotidie circiter decimam partem totius corporis ponderis adaequans, plus minusve imminueretur. Quando vero stomachi superficie per fistulam resorbenda adferrebat aqua, quae mox e stomacho evanuit, copiosior siebat secretio succi gastrici, qui adeo majorem acidi liberi copiam continebat, quam ante aquæ injectionem.

Denique ad sensus et famis et sitis et satietatis excitandos, quorum sedes præcipue a *Francogallis* in stomacho quaerebatur, quorumque conductores ad sensorium nervi pneumogastrici habentur, vagorum dissectione secundum nostra experimenta nullius est

momenti. Nutrimenta solida a nonnullis quidem hand avide accipi videbantur, at liquorum appetitus paene in omnibus graviter creverat, quod partim sane e diminutis partibus liquidis organismi, partim e febriculosa animalis conditione oriebatur.

Ex experimentis allatis igitur cognoscitur, dissectionem decimi nervorum paris in digestionem non exserere vim, nisi quod languorem oesophagi adducat, quem, cum neque nova alimenta potusque neque saliva in ventriculum suggeri queant, succi gastrici secretio imminuta, indeque tardior digestio sequi possunt.

Quod igitur quaestionem attinet de morte dissectis vagis e digestione turbata oriunda, nil conetur possumus, experientia docti, hanc opinionem tanquam parum firmam rejecere. Nam etiam absque horum experimentorum luce, ex digestionis processu inhibito causa mortis deduci non posset, cum constet, animalia omnibus nutrimenti carentia, vel, quod eodem reddit, periculi gratia fame necanda, multo diutius vivere, quam post nn. vagorum dissectionem.

■ ■ ■ ■ ■

Caput II.

Processus respirationis post nervos vagos dissectos.

Jam inde ab explorationibus v. d. *Chirac* et *Valsalva* animus physiologorum intendebatur in pulmonum mutationem, quae sequitor vagorum dissectionem in mammalibus, cui mutationi, cum respirandi facultatem auferre putaretur, iidem viri docti causam mortis modo lentius, modo citius insecurae tribuebant. Verumtamen numerosis ex illo inde tempore ad declarandam illam rem factis experimentis, neque de cansis neque de natura harum mutationum in pulmonibus observatarum certi quidquam inveniri potuit.

Opiniones variae hac de re in lucem editae, quas singulas enumerare atque enarrare neque lectori gratum neque quaestioni mihi propositae consentaneum esset, praetermissa Valsalvae theoria, qui hanc pulmonum mutationem haemorrhagiae violentis in vomendo angoribus effectae adscribit, præcipue ad tres hypotheses revocandæ esse videntur.

A. Paralysis fasciculorum pulmonalium nervi vagi actionem pulmonum respiratoriam restinguat.

Hanc sententiam vario modo edictam invenimus a v. d. *Dupuytrén*⁴⁾, *Emmert*⁵⁾, *Provencal*⁶⁾, *Legallois*⁷⁾, *Brachet*⁸⁾, all., novissime vero a cel. *Schiff*⁹⁾ contra celeb. *Traube* acerrime defensam.

B. Coaretatio glottidis e paralysi muscularum laryngis exorta pulmonum textoram ita mutat, ut respirationis munere fungi nequeant.

Tanquam patroni hujus hypotheseos nominandi sunt v. d. *Valentin*¹⁰⁾ et *Mendelssohn*.

C. Mutatio pulmonum ex oris liquoribus per glottidem languentem in vasa aëria pervenientibus respirationem tollit.

Propugnator hujus opinionis exstat c. *Traube*¹¹⁾.

Cum vero etiam intra fines harum trium hypothesum, secundum varia tempora et varios autores, maxima dissensiones in probandi modo ac ratione reperiantur, équidem nisi explorationibus denuo institutis per hunc controversiarum labyrinthum ad constantem atque satisfacientem sententiam de hac quaestione non perveniri posse credidi.

Protinus igitur transeo ad summani indagationum a me institutarum, et ad illas opiniones varias tantum occasione oblata respiciam.

Omnibus in animalibus, quibus ad experimenta nunc propon-

4) Breviter relatum in Lunds Vivisectionen, pag. 229. *Reil*, Archiv Vol. IX, pag. 380—420.

5) *Reil*, Archiv Vol. IX, pag. 380—420. Ueber den Einfluss des Vag aufs Athmen von *Emmert*.

6) Lund. Vivisect. p. 234.

7) Oeuvres de Legallois 1824, p. 152—215.

8) Recherches expérimentales sur les fonctions du système nerveux ganglionnaire par *Brachet* 1830, p. 129—177.

9) *Griesinger* Archiv 1847, et 1850.

10) *Valentin*, de functionibus nerv. cerebral. 1839, p. 40 seq.

11) *Griesinger* Archiv 1848 Beiträge zur experimentellen Pathol. und Physiol. v. *Traube*. Berlin 1846, p. 65 sq.

nenda usi sumus, sive trunci nervorum vagorum sive rami illorum recurrentes non tantum dissecti sunt, sed particula eorundem aliquot linearum longitudine excisa est. Dissecti vero sunt nervi vagi ipsi in regione glandulae thyreoidis, et in canibus quidem simul cum sympathico proxime cum illis conjuncto. In omnibus etiam animalibus sectione post mortem facta edocebamur nervos laudatos re vera dissectos esse.

Signa, quae post dissectionem decimi nervorum paris in vivis animalibus observabantur, pro enjusque animalis specie diversissima erant. Dum in canibus initio quidem frequentia spiritus ad dimidium minutebatur, quae retardatio vero profundioribus ideoque obvieribus motibus respiratoriis compensabatur, ita ut haec animalia sine graviore respirandi molestia usque ad secundum vel quartum vel etiam ad quintum diem vita fruerentur; in felibus illico post vagos dissectos gravissimam vidimus respirandi molestiam, manifesto ex aëre intercluso genitam, quae tum capitis rejectione, tum lato oris nariumque hiatu, tum caeruleo glabrarum faciei partium colore, tum denique immoderatissimis totius corporis convulsionibus se prodidit. Sanguis ex respiratione impedita non decarbonizatus et ad centra nervorum animanda non aptus, brevi tempore animi defectio- nem assert, quam intra $\frac{1}{2}$ — 1 horam, extremitatibus torpescientibus et urina involuntarie emissâ, certis suffocationis signis, mors se- quebatur.

Tantum in una ex omnibus, quas secuimus, felibus aliis ob- servatus est exitus: nam respiratione, praecipue primis post nervorum dissectionem horis, quamvis magnopere impedita conjunctaque cum stridore serrandi in larynge, nihil securus tamen animal dissectioni tribus paene diebus superstes fuit.

In cuniculis symptomatum complexus postremo simillimus cere- nebatur. Vitulus e contrario, cui ad finem serius proponendum nervi vagi dissecti essent, eadem fere passus est, quae canes.

Constat signum autem in omnibus animalibus, quibus usi sumus, et quae quominus diutius observaremus, mors praematura protinus post vagorum dissectionem nos impidebat, rhythmus motuum respirationis mutatus apparuit. Inspiratio profunda efficiebatur

conjuncta opera omnium musculorum respiratoriorum (respiratio costo-abdominalis), pluribus agentium intermissionibus, quibus facile de respirationum numero in errorem induci posses; expulsio aëris autem brevi temporis momento perficiebatur, thorace subito collabente et contractione omnium musculorum simul evanescente. Numerus respirationum pariter in omnibus animalibus ad dimidiam plerumque partem imminutus est, dum cordis ictus duplo et quod excedit normalem numerum superarent.

Mors in felibus mere suffocativa erat; in canibus vero, cum plerumque noctu perirent, raro tantum nobis copia data est, mortem ipsam observandi. Praecedebant vero gravis languor totius corporis, cordis actio ultimis horis imminuta et corporis calor sensim evanesiens, deficientibus aliis gravioribus symptomatibus; in nonnullis canibus propter linguam lividam, dentibus arte compressam, respirationis molestias in agonia adfuisse, augurari licebat. In his postremis casibus mutatio pulmonum, e continuo exponenda, etiam latiore ambitu apparuit.

Quod jam mutationes post mortem repertas attinet, pulmones animalium brevi post operationem mortuorum plane normalem conditionem ostendebant, et rarius tantum paullo abundantiores sanguine erant; quae vero animalia post operationem etiam aliquot dies vixerant, in iis utique mutationes cernebantur, at vario patentes ambitu et variam externam speciem oculis praebentes. Pulmones scilicet aperto thorace minus collabentes in universum sanguinosiores erant; nonnullae eorum portiones, vario ambitu patentes, in superficie pulmonum humiliores et minus convexae, colore e rubro fusco vel etiam livido apparebant, tactu densiores firmioresque erant, non crepitabant, exsectae et in aquam conjectae illico subsidebant; nonnullae harum portionum fuscarum et aëre vacuarum vehementius paulatim inflato aëre extendi se patiebantur; sed etiam inflatae, fere non minus quam collapsae superabant rubore partes vicinas; aliae contra aëri impenetrabiles mauebant.

Incisione facta in has portiones aëre vacuas elucebat, eas massam duriusculam et sibi aequalem formare, loborum fundum attingentem, ex cuius planitie secando patefacta, quoties scalpellum

manubrio comprimeretur, liquor sanguineus effluxit, spumosus idem, si ex portionibus pulmonum aërem continentibus proveniret. Pituitam cum epitheliis superficialibus oris, ciborum reliquias, et cellulas vegetabilis, quales *Traube* et *Schiff* in mutata pulmonum textura in cuniculis vidisse se dicunt, in canibus, quamquam in eam rem animum nunquam non intendebamus, microscopii ope nusquam demonstrare valebamus. In una tantum fele, quae diutius post vagos dissecatos etiam vixerat, cellulae oris epitheliales in ramificationibus bronchiorum reperiebantur.

Aliud discriminem inter pulmones cunicularum et canum iidem viri docti modo nominati illud statuunt, quod, si cuniculi plus vi-ginti horas vixerint, in portionibus illis e rubro fuscis et condensatis massae albidae densioresque, usque ad seminis canabini magnitudinem, infiltratae reperiebantur, quae in planitie secando patefacta manifesto granosam speciem offerant; quo de discriminatione, cum in cuniculis noanisi raro experiri potuerimus, non habemus quod agamus.

Ad rariora exempla, ab his modo descriptis declinantia, et ad ambitum harum mutationum, serius in referendis singulis experimentis redditurus sum.

Quaeritur igitur:

1) Quaenam hypothesum supra allatarum ad explicandas has mutationes pulmonum lucem sufficientem afferat.

2) Num haec vel alia ex vagis dissecatis exorta mutatio eoque pulmonum actiones perturbare valeat, ut mors accelerata et inevitabilis sequatur.

3) Num forsitan causa mortis aliunde sit quaerenda.

Per se patet, post dissectionem decimi nervorum paris duplensem seriem disturbanceum intra vias respirationis oriri oportere, nimirum languorem nervorum recurrentium, qui e thorace ad laryngem descendunt, et debilitationem plexum vagi pulmonalium. Has disturbancees, operationem illam sequentes, bene discernamus necesse est, qua re effectus in laryngem primo considerandus est.

1) Effectus in laryngem.

Effectus paralyseos nervorum laryngis in respirationem in variis animalium generibus admodum varius conspicitur. Quae vero omnino ut fide digna et nostris quoque explorationibus probata in hac re eluxerunt, haec sunt:

1) Nervorum recurrentium dissectionem, cuius effectus in laryngem dissectioni nervi vagi ipsius plane aequalis est, vocis animalium oppressio statim sequitur.

Hoc signum jam Galeno notum, qui ob eam causam nn. laryngeos inferiores nervos vocales animalium appellavit, a plerisque physiologis confirmatum est, et per longum tempus unicum mansit, cuius mentio facta sit, donec cl. Legallois¹²⁾ animum physiologorum attenderit in disturbancees respirationis plus minus graves, quae nervorum recurrentium dissectionem sequentur.

2) Dissectis recurrentibus rima glottidis in cuniculis vehementissime coartatur, in felibus vero plane occluditur. Ligamenta glottidis in cavo laryngis flaccida pendent, ita ut aëri inculti et exenti magis minusve cedere possint. In canibus e contrario nulla glottidis coartatio locum habere videtur.

3) Animalium vero, in quibus glottis occlusa non observatur, musculi laryngis, ligamentorum glottidis perfecta constrictione, adiutum ad organa respirationis penitus claudere non valent.

In nonnullis felibus, ut motus mutationesque glottidis directe possimus observare, trachea denudata, infra laryngem dissecta, et superiore segmento ab oesophago separato et protracto, lucis radiis aditum aperuimus ad ligamenta laryngis. Haec ligamenta motus rhythmicos normales, dilatationem in inspirando et coartationem in exspirando, ostendebant. Dextro nervo recurrente dissecto dextrum glottidis ligamentum motione privatur, dissectionem sinistri paralysis alterius ligamenti exemplo sequitur. Glottis hoc tempore speciem rimae paene prorsus clausae praebet, et solummodo glottidis respiratoria, inter cartilagini arytaenoideas sitae, perparva superest

12) Oeuvres de C. Legallois. Paris. II. p. 169.

apertura, ad aëris transitum manifesto non sufficiens. Ex hac graviori coartatione ergo declaratur mors paene subita animalium.

Multo aliter nervis recurrentibus dissectis se habent canes, qui hanc sectionem, ut in duobus casibus certiores facti sumus, sine ulla valetudinis disturbance ferunt. Tantum in vorando interdum tussicula gutturalis nec non motus quidam vomitorii animadvertuntur, quod etiam a v. d. Schiff observatum et eo modo declaratum est, ut reliquiae quaedam cibariorum, ob impeditam gluttiendi motionem vel ob languentes faucium musculos in pharynge haesitantes, motus illos reflexivos excitaverint.

Ligamenta thyreoidea, quae ut conspici possent ratione supra dicta effectum est, omni motione carebant, glottidis vero rima immobile quidem sed late hiantis speciem praebebat, et transitum aëris in spirando minime impeditiebat.

Quum in felibus tum in canibus mutatio glottidis post nervos vagos ipsos dissectos omnino eadem manebat, quae ramis eorum recurrentibus dissectis fuerat.

Eluet igitur, imminutam post vagos dissectos frequentiam respirationum non, ut Mendelssohn et aliis volunt, pendere posse a mutatione glottidis, cum recurrentibus dissectis talis retardatio non sequatur. Sin autem Longet¹³⁾ contendit: „Les animaux privés de leurs nerfs récurrents respirent plus vite qu'à l'état normal,“ et simul credit, eventum, statim post operationem factam prodeuntem, sufficere ad rem decernendam, nos illi adsentire nequimus; primum quod recurrentibus dissectis accelerationem respirationis non observavimus, deinde quod ejusmodi acceleratio tantum illico post operationem obvia, et postea evanescens fortuita credenda est, et probandi vim habere non potest, nisi perdurat. Quod quamvis secundum v. d. Longet locum non habeat, nihil minus idem ille spiritus accelerationem ad breve tantum tempus post operationem durantem inde derivat, quod iteratis respirationibus aëris ob coartatam glottidem minus copiose intrantis copiam ut augeat nitatur animal.

13) Longet, Anatoni. e Physiol. du Système nerveux. Paris. 1842. II. p. 359.

Varietas symptomatum post dissectos nervos vagos observatorum, quae ut v. dd. *Legallois*¹⁴⁾ et *Longet* jam satis demonstraverunt, non tantum in variis animalium speciebus, sed etiam in una eademque specie, pro aetate et corporis conditione varia, maxime conspicua est, melius sane explicatur elasticitate et resistendi facultate diversa cartilaginum glottidis. Catuli, feles, cuniculi et secundum *Schiffum*¹⁵⁾ animalia omnia, quorum larynx juvenilem conditionem retinet, vel quorum vox tantum sonis altis gaudet, post nervos vagos dissectos tantum ea signa praebent, quae a glottide ob languorem nervorum recurrentium clausa pendent; jam enim suffocantur priusquam ceteri dissectionis effectus in conspectum venire possint.

In animalibus hisce ope tracheotomiae respirationis difficultates, ex rima glottidis aut coaretata aut prorsus oclusa prodeuntes, tolluntur, simulque, vita in aliquot dies prolongata, pulmonum affectio ex un. vagis dissectis oriunda effici potest.

Ad quas observationes si primum experimenta, quae cel. *Traubbe* obturatoris sui auxilio instituit, adjeceris, si deinde tracheae constrictionem a *Schiff* factitatem, si casus rimae glottidis coaretatae pathologicos in commentatione *Traubiana* ex scriptis *Petri Frankii* et *Morgagnii* commemoratos, nec non rimae glottidis coaretationem saepe haud mediocrem, in laryngite exsudativa vel in forma oedematis pulmonum subacuta obviam addideris, quibus omnibus in casibus nunquam apparuit pulmonum affectio; illa omnia inquam si reputaveris, nullas videtur dubitationi locus esse, quin opinio, a nobis sub litera B allata, qua quis mortem post nervos, de quibus dicimus, dissectos consequam ex pulmonum mutatione aliqua, effecta rimae glottidis statu, dependere arbitretur, satis demonstrari defendique omnino nequeat. Respicias porro, quam manea et imperfecta sit explicatio, quam *Mendelsohn* de istius affectionis pulmonum origine proposuit, quum ex ea explicatione elucidere videatur, virum doctum quamlibet textuae transmutationem, ex hyperemia

enatam nomine inflammationis pulmonum appellare; quam ob causam, quemadmodum *Schiff* verissime judicat, *Mendelsohn* non difficile esse potuit, demonstrare, omnes, quas animadvertis, commutationes pares easdemque esse, quippe quum jam ex temporibus cli. *Broussais* inflammationem constet tantummodo unam sibi constantem esse!

Contra negari non potest, in nonnullis animalium speciebus, nervis vagis dissectis, haud exiguae, quae inde existat, coaretationem aut perfectam rimae glottidis occlusionem celerem mortem adducere posse. Ad quem posteriorem eventum, quantum in nobis esset, illustrandum, ut de ramulorum a nervo vago exeuntium in laryngis muscularis distributione nec non de muscularum istorum dispositione certiora quaedam edoceremur, nonnullorum canum feliumque larynges via anatomica accuratius investigare conati sumus.

Ad dispositionem nervorum laryngis quod attinet, cl. *Longet*¹⁶⁾ his verbis utenti haud dubii adsentimur: „Les nerfs recurens font contracter les muscles du larynx, hormis les cricothyroïdiens“; conclusioni tamen inde a viro docto effectae: „et par conséquence ils influencent à la fois la constriction et la dilatation de la glotte.“ objicere debemus, nos potius ex pervestigatione anatomica cognovisse, canum saltem laryngem nil praebere, quo rimae glottidis coaretari queat. Namque musculos arytaenoideos, symmetrica ratione dispositos, processus cartilaginum arytaenoidearum vocales tantum ad partem externam movere, ideoque rimam glottidis latiorem fieri, nobis persuasimus; quare musculis illis post nervos recurrentes dissectos paralysi correptis, laryngis partes, naturam suam elasticam sequentes, statum quietis recuperant, quo aut laryngis rima, sicuti in felibus sit, omnino evanescet, aut, quemadmodum in canibus evenit, aëri aditum permittit satis liberum.

Quod quum ita sit, rimae glottidis in vivis coaretata nihil est aliud quam redditus ad quietem sive ad eum statum, qui nobis in animalibus mortuis offertur: neque vero, quae clarissimi *Magendie* est sententia, coarctatio illa innititur in sublato antagonismo inter

14) I. c. p. 171. sq.

15) I. c. 285. sq.

16) I. c. pag. 359.

n. laryngeum superiorem et inferiorem intercedente, priore constrictores, altero dilatatores rimae glottidis excitante.

Nullam ejusmodi antagonisticam rationem adesse eo quoque modo nobis persuadere poteramus, quod nervi laryngi superioris dissectio, qui quidem ramum exteriorem ad m. cricothyreoideum, internum ad membranam mucosam laryngis emittit, nullam exhibuit vim ad muscularum arytaenoideorum motiones. In una tantummodo fele vox paululum facta est aspera, in ceteris tamen nulla permutatione animadversa.

Nihilominus laryngis paralysis, n. vagis dissectis exorta, secundum conjecturam C) a cl. *Traube* prolatam ideo pro mortis causa fuit habita, quod ita fluidis oris atque alimentis introitus in vias aëriferas paretur, per easque alienas substantias telae pulmonum inflammatio producatur.

Quae opinio quam parum idoneis nitatur argumentis, jam *Schiff* diligentius explicavit. Pariter nobis quoque experimentis in canibus facilitatis non defuit occasio cognoscendi, rimam glottidis, quamvis n. vagis dissectis paralysi affecta sit, tamen in vorando, larynge sursum promoto, concludi, alienarumque substantiarum ex oris cavitate in vias aëriferas transitum evitari.

Deinde hoc quoque adjicere liceat, quod in omnibus, quos operationi submissimus, canibus, adeoque in iis, qui quinto demum die mortem occubuerunt, massas membranam mucosam tracheae ac bronchiorum tegentes sub microscopio contemplati nunquam cellas epitheliales oris reperire potuimus. Uno tantum in casu, quo felis, cuius mentionem jam fecimus, post vagorum dissectionem duos fere dies in vivis mansit, in membrana mucosa tracheae cellas epitheliales satis crebras, deorsum magis magisque raras, deprehendimus, quae denique in ramificationibus tenuioribus omnino non occurserunt. Verumtamen in hoc adeo animali, in quo satis fuerat temporis ad parenchyma pulmonum permutandum, eae mutationes tam erant exiguae, ut illis mortem allatam esse, ne minima quidem existere posset suspicio.

Quae a *Traube* ad sententiam suam fulciendam in animalibus peracta erant experimenta, scilicet tracheotomy, viarum aëriferas

a digestionis apparatu disjunctio, quem ad finem vel apparatus quidam disjungens in tracheam perfectam introductus vel oesophagus subligatus dissecatusque erat, praeterea fluidorum oris, quae ex oesophago dissecto obtinuerat, in pulmones ingestio, eadem omnia experimenta a *Schiff* repetita diversum prorsus atque contrarium eventum praebuere. Qui vir eruditus, postquam se neutiquam, id quod *Traube* contenderat, alia quam hunc methodo in faciendis periculis nsum esse demonstravit, diversum utrorumque eventum inde repetendum esse judicat, quod pulmonum mutatio, a nervorum paralysi oriunda, in animalibus, a *Traube* operationi submissis, fortasse serius apparitura fuerit, nisi *Traube* animalia sua jam 20–22 post operationem horis transactis necasset.

2) Vis in pulmones exhibita.

Conjecturam, qua nervis vagis dissectis texturae pulmonum commutationem quandam laryngis paralysi provocatam, respirandi facultate sublata, mortem adferre judicaverunt viri docti, capite proximo superiore demonstrasse videmur, in una saltem animalium specie, in canibus nempe, nullo modo idoneam aut satis probabilem esse existimandam. —

Itaque non relinquitur nobis nisi unum momentum, quo pulmonum mutatione effecta mortis causa inniti credatur; vim dico, quae nn. vagorum fasciculis pulmonalibus correptis exerceatur. —

Attamen hanc quoque vim, ut supra jam breviter significavimus, alii aliis rationibus censuerunt mortis causam posse existere.

Namque, sicut *Valsalva* ideo opinatur pulmones mutationem subire, quod, haemorrhagiis per violentas vomiturations exortis, multum sanguinis in illa organa profundatur; ita *Legallois* rursus in animalibus, quae non exemplo suffocationi, mechanica occlusione effectae, succumbant, fluida arbitratur in pulmonibus accumulata, mutua vi, quae inter aërem sanguinemque intercedat, impedita, mortem haud dubiam inferre.

Schiff denique pulmonum commutations, de quibus agitur, inde testatur proficiisci, quod nervorum ramuli, ex fasciculis pulmo-

nalibus ad vasorum capillarium systema tendentes, vim suam habere amplius nequeant.

Sic enim, pariter atque in aliis sanguinis accumulationibus, ex nervorum paralysi enatis, dilatationem vasorum capillarium, hyperaemiam atque exsudationem progigni affirmat, quae quidem pro temporis diuturnitate, quantum animal operationi peractae superfluerit, tum intensitate, tum extensione perpetuo increscant. Itaque, illo testante, laryngis, oesophagi ac pulmonum functiones turbatae unius ejusdemque causae effectus sunt, quae quidem causa in nervorum vagorum partis sub loco dissectionis sitae vi sublata innititur. Inde vir doctus experimenta quaedam instituit, vim paralyseos laryngis a vi paralyseos fasciculorum pulmonalium sejunctim perscrutaturus, quae experimenta, a nobis jam ex parte commemorata, eo arbitratur valere, ut palmonum mutationem tantummodo a vi posteriore dependere eluceat, ideoque opiniones adversus ipsius theoriam prolatas argumentis idoneis firmatas non esse.

Denique suae sententiae veritatem sibi videtur sic luculentissime demonstrare, ut, laryngis motionibus non impeditis, nervos vagos paralysis corripiat, quare, quamvis momentum praeceps a cl. *Traube* adlatum prorsus tollatur, nihilo secius tamen pulmonum affectionem oriri contendit. Quod ut adsequatur nn. vagorum ganglion persectat, n. accessorii ramulo anastomotico parcendo, quem ad internam ganglii appellati partem nec non infra ganglion per aliquantum spatii, specie albidae lineae, separatum omnino decursum inire vidit.

Etiam si, permagnae difficultatis, quae isti operationi objicitur, ratione non habita, de ejus argumenti veritate dubitare nolueris, tamen id vel ob hanc causam admodum videatur ambiguum; quod hucusque neutiquam sit demonstratum: ramos pulmonales n. vagi inde a nerv. accessorio esse repetendos.

Nos quoque, quum paralyseos laryngis nullam vim esse viderimus ad texturam pulmonum transmutandam, non possumus, quin mutationum istarum causam aliqua ex parte in paralysi nervorum ad pulmonum telam contractilem tendentium repositam esse arbitremur. Sic enim accedente præterea alio quodam momento, cuius

postea locus erit, ubi mentionem inferamus, sanguinis accumulatio in vasibus capillaribus, ob tonum depresso parum retinentibus, exoritur, qua viis aeriferis compressis, singulis in partibus status aere vacuus produci queat. Verumtamen theoriae de gangliis a *Schiff* ad explicandam confirmandamque sententiam suam prolatae nullo modo adstipulari possumus, quum gangliis per ramulos nervorum cerebralium vitam suppeditari dicat. Non possumus autem adsentiri, quoniam, quamvis nervis cerebralibus aliquam vim ad gangliorum functionem mutandam attribui posse concedamus, tamen posteriorum efficacitas haudquaquam necessario a prioribus dependere existimanda est. Ergo, quum in pulmonibus, sicuti etiam a *Schiff* via anatomica monstratum est, magna gangliorum insit multitudo, nequaquam necesse est, nervis vagis vel simul sympathico dissectis, sanguinis accumulationem ex parietibus vasorum paralysi correptis oriri. Nam, operatione ista instituta, nervi vasorum pulmonalium non nisi ex parte, neque vero toti a suis centris ueriosis disjunguntur. Sympathico autem simul dissecto, nullam graviorem causam ad pulmonum affectionem provocandam, adesse ea de re post experimenta creberrima, a *Pommer* aliisque factitata, inter omnes satis constat.

Cum iis, quae modo proposuimus, periclorum a nobis institutorum eventus optime concinit, quippe ex quibus apparuerit, pulmonum mutationis et extensionem et gradum neutiquam ullo cum vita post nervos vagos dissectos extingueda contineri connexu.

Pulmones duorum canum illorum, quibus, antequam vagi dissecarentur, fistula ventriculi adplicata erat, quamquam satis fuerat temporis ad sanguinis accumulationes provocandas, tamen non nisi perquam exiguae offerebant commutationes.

In altero eorum canum, qui tertio post operationem die superstes erat, pulmones statu reperti sunt omnino normali, praeterquam quod in superiore lobo pulmonis dextri aliquot aderant loca paululum depressa, ejusdem atque pisa magnitudinis, colore caeruleo-rubro imbuta, quae tamen ipsa, aequa ac toti pulmones perfecte inflari poterant, tantumque, etiam aere elapo, colore magis rubicundo tingebantur.

In altero cane, qui adeo quatuor dies ac dimidium post nervos vagos dissecatos supererat, una cum minuta succi gastrici secretione universalis fluidorum inopia innixa, pulmones etiam mirum in modum siccios se praebuerent, ita ut pars eorum calore 120° C. exsiccata 26,73% substantiae siccae contineret. Ceterum totus pulmo sinister nec non uterque lobus superior pulmonis dextri prorsus normales cernebantur, dum solum inferior pulmonis dextri lobus colorem intensiorem offerebat et densior quam statu normali se praebebat, ita tamen, ut et ipse aëris pressu sensim ac paulatim aducto inflari posset. Neque silentum est, animal per ultimas vitae horas aequae ac post mortem lateri dextro incubuisse.

In cane femina denique, quae 5 dies post nervos vagos dissecatos in vivis remanserat, tantum anteriori margini lobarum superioris ac medii pulmonis sinistri nihil aëris inesse observavimus.

At, quaecunque fuerit causa earum mutationum, quas post nn. vagorum dissectionem pulmonum parenchyma subit, tamen propter exiguum, quam ostendunt, extensionem satis certum et exploratum est, easdem non sufficere ad pulmonum functionem adeo prohibendum, ut ii vitae continuandae amplius idonei non sint. Namque tantum in singulis iisque perpaucis casibus nostris istae permutationes quartam fere pulmonum partem occupaverant; pariterque pericula plurima, a Traube facilitata, quemadmodum ipse disertis verbis adfert, non nisi testiam pulmonum partem mutantam ostenderunt, in singulis casibus adeo, quum mors post 2—3 dies consecuta esset, nulla modificatione animadversa. Aceedit, quod satis crebro in casibus pathologicis pulmonum turbationes, vel tuberculosis depositis vel pleuriticis exsudatis effectas, multo longius patere videmus, vita tamen ob insignem illam pulmonum facultatem, qua alter minutam alterius actionem compensat, complures per annos perdurante.

Quodsi mors, quemadmodum omnes fere physiologi consensu assumunt, nihilo secius a respirationis processu aut turbato aut prorsus sublato deducenda sit, eam, quum materiales mutationes, quae ad id efficiendum sufficient, nullae inveniantur, non possumus, quin chemismo imperfecto, propter extinctam nervorum vim commutato, adscribamus.

Quae jam priore aetate de efficientia directa, quam nervorum vis sublata exhibeat, propositae fuerunt conjecturae, illae quidem, postquam a cl. Volkmann¹⁷⁾, non solum argumentis ab ipsa ratione petitis parum verisimiles, verum etiam institutis experimentis prorsus falsas esse demonstratum est, pro eo, quo hodie ars medica posita est, statu nullo modo amplius sufficere possunt. Longum est, omnes istas hypotheses afferre: nobis satis erit, singulas commemorasse. Sic Brachet¹⁸⁾ et Arnold (Müllers Arch. I. c.), nn. vagis dissecatis, sensum necessitatis spiritus ducendi extinctum esse judicarunt, respirandi motionibus tamen propter consuetudinem per aliquod tempus continuatis. Marshall Hall¹⁹⁾ nervum vagum respirandi motus non voluntarios, irritatione CO₂ provocatos, peragere testatur, ideoque, nn. vagis dissecatis, respirationis processum ob ducendi spiritus necessitatem ab aliis praeter vagos nervis expletam et sic perdurantem, a solo cerebro tamquam organo voluntatis continuari credit.

Nos, ut nobis persuaderemus, num chemica pulmonum functio ob diffusionem ex vi nervorum sublata comminutam tantopere impediiri turbarique posset, ut sanguinis in pulmonibus metamorphosis non amplius eo, qui ad organismum conservandum necessarius est, modo perficeretur, omnino existimavimus opus esse, ut ad pulmonum actionem dijudicandam certiora institueremus pericula.

Quod ut contingenter nobis, ope apparatus respiratorii a clarissimo professore Buchheim inventi, de quo statim pauca quaedam adjicere liceat, mutationes chemicas, quas aëris animalibus in illo versantibus subiret, certius constituere conabamur. Qua in re maxime ad copiam CO₂, quae aëri expirato inesset, animi attentionem convertendam esse arbitrabamur, quippe quam nunc minutam

17) Müllers Archiv. 1841. p. 332 sgg.: „Ueber die Bewegungen des Athmens und Schluckens, mit besonderer Berücksichtigung neurologischer Streitfragen v. Volkmann.“

18) Recherches experim. sur les fonct. du syst. nerv. gangl. par Brachet. Paris. 1830.

19) Anat. et Physiol. de syst. nerv. par Longet II. 1812. p. 307.

nunc adactam, pulmonum actionem examinantibus normam nobis praebitaram esse censeremus.

Quum autem temporis spatium angustum, quo pericula de respiratione factitanda uteremur, nobis non permitteret, ut simul, quanta gasorum copia animalium exhibitorum sanguini inesset, perquireremus, in solis, quas diximus, commutationibus constituendis operam insumere licuit.

Quantum nos novimus, ad hunc diem neque experimenta instituta fuerunt, quibus evinceretur, quantopere animalium respiratione nervis vagis dissectis aer transmutaretur, neque ad quaestionem, in qua commentatio nostra versatur, explicandam analyses factae sunt, ut, quantum Oxygenii atque CO₂ sanguini tum inesset, cognosceretur.

Fuerunt quidem nonnulli, uti Dupuytren²⁰⁾, Dupuy aliique, qui ex colore utriusque sanguinis intensiore conclusionem efficerent, phaenomena chemica post operationem, de qua diximus, peractam vel minuta vel prorsus inhibita esse; at haec tamen ratio tam credenda est manca atque imperfecta, ut ullam ei dignitatem attribuendum esse negemus.

Provencal²¹⁾ deinde, nervis vagis dissectis, suffocationem opinatur ex trium momentorum praesentia, usque ad mortem magis magisque vi crescentium, deducendam esse; primum enim parum consumi oxygenii, tum minorem, quam statu normali, copiam CO₂ effandi, denique temperiem decrescere. Verumtamen ea conjectura nullo videtur experimento firmata esse. Itaque a solo Clement²²⁾ equi sanguis, post nervos vagos dissectos, diligentius pervestigatus fuit, in quo periculo hac inventae sunt proportiones:

1000 partes sanguinis continebant:

ante dissectionem	post dissectionem
aquac = 822,5	798,9
albumin. et salium = 86,2	90,1
fibrini = 7,2	7,8
corpusculorum = 84,1	103,2

20) Physiolog. Resultate der Vivisectionen der neuern Zeit. P. W. Lund. Kopenhagen. 1825. p. 229. — ibidem p. 239. sqq.

21) ibidem p. 234.

22) Comptes rendus 1850 deux. semestre p. 289.

Ex qua observatione Clement sequi opinatur, pulmones, si haud amplius a vi nervorum ad ipsorum functiones normales necessaria pendeant, a) sanguinem non perfecte elaborare, b) multum aquae exhalare, nova tamen aqua non genita, c) parum aut nihil albuminis comburere et denique d) cum vitalitate totius organismi extineta fibrinum corpusculaque simul cum albumine adaugeri. Copiae gazi, quod hoc in casu maximi fuisset momenti, nulla omnino a viro docto habita fuit ratio.

Apparatus respiratorius, nuper uberioris diligentiusque in dissertatione inaugurali, ab Holtermann composita, descriptus, ad quam quidem descriptionem complendam delineationem a commilitone amicissimo Harzer factam operi meo adjungo, secundum haec fere principia est, constructus: Cavea animali destinata cum gazometro oleum continente conjuncta est, quod brevissimo temporis spatio parte aeris·caveae inclusi impleri potest. Caveae ipsi, excepto foramine, per quod animalibus inclusis aer atmosphaericus admittatur, aeris externi aditum omnino intersepare licet. In periculis ad examinandam respirationem institutis aer caveae inclusus ope aspiratoris scala in litras distributa praediti per tubulorum systema ducitur, quod caveae proximum ex tubulo calcium chloratum continente ad gazum siccaudum destinato, tum ex apparatu kali caustico liquido impleto ac pensato auctore Liebig, porro duobus pariter pensatis tubulis kali causticum siccum continentibus et tubulo altero, cui Calcium chloratum inest (cautelae causa) consistit. Experimento de respiratione finito, gazometrum oleo repletum et cum cavea coniunctum parte aeris, qui ultimus caveae inerat, examinandi causa repletur, eaque pariter ope aspiratoris per tubulorum systema modo descripto omnino simile ducitur. Copia aeris in periculis de respiratione factis explorati copiam aquae ex priore effusam aequat; pondus apparatus absorbendo inservientium adactum copiam CO₂ indicat. Gazometro quod cum cavea coniunctum exinanito, ex proportione, quae ejus capacitati cum amplitudine caveae intercedit, dedueto volume animalis, et ex adacto pondere apparatus resorbendi copia CO₂ aeris caveae inclusi statim post experimentum de respiratione institutum computatur.

Cavea ad animal recipiendum destinata litras 135,108 capit, gazometrum oleum continens cum illa conjunctum litras 8,570. — Animalis volumen ejus ponderi par habetur. In constituenda copia CO₂ in aëri atmosphaericō obvii, hic ope aspiratoris scala instructi per tubulorum systema quod illi in experimentis de respiratione adhibito prorsus par est, dicitur“.

Nos ad experimenta de respiratione instituenda canibus uterbamur, magnitudinis apparatu nostro accomodatae, in quibus, quantum experientia docuerat, post nervos vagos dissectos nulla extaret mechanica respirationis turbatio. In felibus, adeo quam post tracheotomiam institutam vita continuabatur, in processu respirationis statum a normali tam abhorrentem intrare necesse erat, ut is, si quidem pulmonum actionem, tamquam effectum ex nervorum vagorum dissectione prodeuntem, dijudicare vellemus, admodum nos turbatur furerit.

Canes igitur jam ex longiore ante operationem instituendam tempore copia certa ope trutinae examinata pabuli, e carnis consistentis alebantur, corporisque pondus aliquoties tum post cibos sumptos, tum post unius vel complurium dierum inediā constituebatur, ut experimenta de respiratione facienda, diversis post coenam temporis spatiis, quantum CO₂ effunderetur, docerent. In periculis post nervos vagos dissectos factitatis respondentes ciborum praebendorum termini, quantum sieri posset, observabantur. Pariter curabamus, ut animalia quo tempore respirationis experimenta suscipebantur, et antequam dissecarentur nervi vagi et postea, quam maxime fieri liceret, aequabili motione utearentur; quem in finem arcum, in quam erant inclusa, pulsare et per fenestram ejus carnium frustulis ostentandis animalia adlectare non omittebamus.

Pericula illa de respiratione, quae primum per duas horas continuaveramus, postea tamen non nisi unius horae spatium durare poterant, quam animalia, nervis vagis dissectis, plerisque in casibus haud dubie ob aërem nimis compressum simulque nimia CO₂ copia impregnatum, in arca sua admodum inquiete se habent, ac suffocationis anxietate vehementissimoque vomitu valde cruciantur, nisi aqua ex gazometro celerius defluente aëris atmosphaericī major copia per arcum ducebatur.

Canis I.

Ante nn. vagorum sectionem.

Mensis.	Dies	Pondus corporis libogram.	Numerus spirituum per horae sexages.	Carnes praebentur	Carnes praecipue.	Thermometri status	Experimenta de respiratione.				
							qua tempore.	qua copia.	Arcae temper. per cent.	Aridi carbonici exspirati gramm.	Acidi carbonici 1 horae gramm.
Februario 10.	4,468			10	225	" 130 11 30 "	10	" 120	0,2895	0,410	4,9041 4,0931
11.	4,387			14	365	24 30 11 15 120	25	24 30	0,272	0,5485	6,479 5,670
12.	4,232			15-18	10	50 45 13	145	50 45	0,5958	0,508	4,7405 3,9437
13.	4,500	90-100		10	225	- 130 10	2	- 120	0,815	0,7673	6,2545 5,4679
14.	4,526		8 30	225		25 10	2	25 10	1,005	0,941	7,683 6,901
15.	4,400					30 30 11	2	30 30 11	14,7 19,2	0,532	0,6595 5,3005 4,5128
16.	4,262										

post nn. vagorum dissectionem.

190-200	8	9 30 250 737,7 11,5	6 30 16 30 1	13,5 14,5 0,4065 0,5315	8,5175 7,7348
21.	4,312				

Cadaveris sectio.

Pulmones thorace aperto aliquanto minus collapsi videntur et sanguinosiores quam in conditione normali: pulmonis sinistri lobus medius maximam partem, et lobi superioris loci dispersi maculas saepius jam commemoratas nigricantes et aëre vacuas ostendunt. Cellulae epitheliales oris in viis aëris nusquam inveniri possunt; liquor ex affectis portionibus sumtus ostendit numerosos sanguinis globulos, et passim globulos adipis aggregati cum liberis adipis granulis, quorum copia vero minor est, quam ut inde colligi possit, exsudatum gravius locum habuisse.

CO₂ exhalatio igitur post nn. vagos dissectos aucta appareat.

Canis III.

Mensis.	Dies	Pordus corporis kilogram.	Numerus spirituum per horae sextages.	Carnes praesentur qua tempore.	Experimenta de respiratione.										
					Thermometri scatus barometri qua copia.	Tempus post pranditis pabulis horas.	Quaam diet. tempore.	Tempus in pe- nitenti.	Tempus in pe- nitenti.	Acac temper. post consump.	Acac temper. percut.	Acidi carbonici exspirati gramm.	Acidi carbonici 1 horse.	Ab animali- tate exspirati.	
Martii	1.	9,630	9,400	95—110	763,7	15,5	12'10'	15	1	14	16	0,8285	0,8345	13,0465	12,2514
	2.	9,083	9,165	18—22	763,7	16	19'17'	15	1	11,5	19	0,671	0,6555	10,286	9,497
	3.	9,438			762,5	17,5	38'10'	30	1	16	19,4	0,5755	0,563	8,8515	8,0651

post m. vagorum dissectio[n]em.

Martii	4.	9,455			752,9	16,5	12	11	11	1	15,5	20	0,6415	0,867	13,3535	12,5579
		9,130	170	10												
		9,130	185	12	752,9	16,5	19	18,5	1	15,5	18,5	0,8935	0,983	15,2375	64,4282	

Cadaveris sectio.

Mutatio texturae pulmonum i. e. sanguinis accumulatio in
hoc animali altiore gradum attigerat, praecipue in inferioribus lobis
ntriusque pulmonis: viae aëreæ in his partibus compressione aëri
impenetrabiles factæ erant. In bronchiis reperiebatur copiosus liquor
viscidus, rubro colore tinctus, ruptis sine dubio vasis quibusdam
capillaribus e vehementioribus vomendi motibus exortus, et sub
microscopio corpuscula sanguinea liquori pellucido innatantia præbens.

Copia CO_2 in aëre exspirato hic etiam post operationem major erat quam ante eam, ceteris conditionibus et ante et post operationem paribus; nam etiamsi in priore experimento, quod illico post sectionem peractam instituebatur, augmentum exspirati CO_2 minus sit, idem in sequenti experimento, octava fere hora post operationem instituto, tanto majus est.

NB. Notandum esse videtur in hoc cane irritationem tussicularem cruciantem et ex catarro pulmonum ortam illico post operationem evanuisse.

Canis III.

Cadaveris sectio.

Pulmones, excepto anteriore margine medii et superioris lobi pulmonis sinistri, plane sani reperiebantur, etiam in hoc cane brevi post operationem auctam CO_2 exhalationem invenimus; et si in sequentibus periculis de respiratione institutis copia haec plus minus imminuta est, tamen eadem, respectu jejunii continuati et ponderis corporae perpetuo immixuti, sine dubio aucta appellanda est. — Ad explicandam ultimam in tabulis allatis columnam addere licet, quum in illa acidi carbonici copia, quam exhalatam diximus, semper inesset illa quoque ejusdem acidi copia, quae in aëre atmosphaericо cubiculi inveniretur, nos in hunc quoque erroris fontem inquisivisse. Itaque ope gazometri, ad illius acidi in aëre inspirato obvii copiam definiendam decem suscepimus pericula, ex quibus medium statuimus, quod, si a quantitate, quam exspiratam diximus subtraheretur, veram carbonei exhalati copiam exspectare poteramus. Medio illo numero vero propterea uti debuimus, quia, quod in animo quidem erat, experimenta de respiratione ac de aëris atmosphærici constitutione simul instituenda, ob impedimenta quaedam fortuita non successerant et repeti non poterant.

Experimenta.

Nrs exper.	Mensis.	Dies,	Dici tempus.	Status		Copia aëris analyse, in litris.	Copia CO_2 reperita, in grammatis.	Copia CO_2 in 1000 litr. aëris atmospherici.
				barom.	thermom.			
Mm.	° C.							
1.	Martii 1.	17 ^h 20'	763,7	16	24	0,2265	9,438	
2.	2.	10 30	762,5	17,5	24	0,124	5,167	
3.	"	19 30	762,5	16	24	0,0865	3,604	
4.	4.	11	752,9	16,5	24	0,1376	5,729	
5.	"	18 5	752,9	16,5	25	0,2455	9,820	
6.	7.	10 24	746,4	18	24	0,215	8,958	
7.	8.	10 38	746,4	18	24	0,1195	4,979	
8.	"	18 30	746,4	18	24	0,0775	3,229	
9.	9.	10 30	750,5	17,8	26	0,0365	1,404	
10.	13.	18	756,8	15	30	0,131	4,367	
				Medium		5,6595		

Communem igitur et constantem experimentorum in tabulis allatis supra expositorum summam habere cogimur: mortem, actione pulmonum post vagos dissectos manifesto aucta, non posse derivari à disturbata functione eorum chemica.

Itaque effectum unicum et constantem, in respirationis processu post vagos dissectos manifestum, revera agnoscere quidem debemus spiritus rariores, a quorum explicacione vero hucusque nobis abstinentum est.

Qua in re autem causa exhalationis CO_2 , post vagos dissectos manifesto auctae, sit quaerenda, continuo videbimus.

De vi nervis vagis dissectis in cor exhibita.

Jam *Piccolhomini* physiologorum animos ad mortis periculum, operatione, de qua agimus, illatum intendens, cordis motiones cessantes pro causa habendas esse existimavit.

Brevi tempore longus processit ordo physiologorum, partim istius sententiae suscipientium patrocinium, partim eandem acerrime impugnantium. A fine nobis proposito alienum videtur, veremurque ne lectori benevolo parum gratum faciamus, si omnes eas differentes inter se virorum eruditorum opiniones huc pertinentes fusjns diligentiusque explicemus. Omittimus ergo istas tanto lubentius, quod recentiore demum aetate, opera a cl. *Ed. Weber* insumpta, vis nervorum vagorum cordis actionem inhibendi, gangliosis cordis centris ad tempus paralysi affectis, satis cognita atque constituta fuit, indeque per vestigationibus de ratione, quae vago cum cordis actione intercedat, suscipiendis alia quasi via, quam insisterent, praescripta est.

Phoenomenou in corde post nervos vagos dissectos constantissimum idemque ab omnibus recentioris temporis observatoribus confirmatum, praebetur pulsationibus insignem in modum acceleratis; quae quidem acceleratio, si ab exiguis quibusdam vacillationibus discesseris, plerisque in casibus adeo 12 — 24 post operationem horis circumactis adhuc increscens usque ad paucas ante mortem horas aequabilis mansit, ac brevi demum ante ipsam mortem tempore cessare solebat: mediis autem harum pulsationem-numerus sexage-

sima horae parte in canibus 150—180 erat, duplo igitur normam superabat.

Cui acceleratae pulsuum cordis frequentiae num energia quoque adaucta responderet, nobis persuasuri, in vituli carotidem haemodynametrum inferendo observavimus, hydrargyri columnam ante operationem usque ad 5, 2—5,6" par. extolli, post operationem vero ad 7, 4—8, 5 poll. par. surgere. Itaque, pariter atque jam cl. Volkmann in dissertatione *Jacobsoniana*²³⁾ commemoravit, et multo magis etiam, quam in experimentis in libello illo edatis, simul cum adaucta pulsuum frequentia etiam cordis energiam mirum in modum increvisse videbamus.

Haec igitur aucta cordis actio primum causa existit, cur in vasis capillaribus pulmonum aliqua ex parte delibilitatis sanguinis accumulationes oriuntur. Hic deinde major sanguinis multum Carboni continentis affluxus efficit, ut in periculis de respiratione post nervos vagos dissectos factitatis tanto plus CO₂ effundatur. Denique huic eidem nimis irritatae cordis actioni causa mortis animalium innititur, quippe quum, praegressa actione tantopere normam excedente, secundum leges de irritabilitate omnium animalis partium, atque praesertim de nervorum muscularumque incitabilitate bene constitutas, exhaustio ideoque, quum ad vitam continuandam tam graves ac necessarias partes cordi attributas sciamus, mors ipsa subsequi debent.


23) Quaestiones de vi nervorum vagorum in cordis motus. Halis Saxonum 1847.



Contendo.

- 1) *Causam mortis nn. vagis dissectis in exhausta cordis actione querendam esse.*
- 2) *Non ubique valere musculos laryngis ratione antagonistica dispositos esse.*
- 3) *Motus ventriculi non pendere a n. vago.*
- 4) *Naturam contagii, nisi animalum esse accipiatur, prorsus nos fugere.*
- 5) *Versione obstetricia foetum magis periclitari quam matrem.*
- 6) *Rhachitidem et osteomalaciam morbos diversos esse.*





- A) Cavea cui animalia includantur.
- B) Apertura per quam animal caveae inferatur.
- C) Gasometrum oleo repletum.
- DD) Gasometra aspiratorum vice fungentia.
- a) foramen aëri, atmosphaerico immittendo inserviens.
- b) foramen ad aërem qui caveae inest emittendum.
- cc) tubuli epistomio instructi quibus cavea cum gasometro oleum continente jungatur, et per quas gasometrum repleatur.

- d) tubulus epistomio praeditus ad gasometrum oleum continens evacuandum.
- e) vas ad recipiendas olei guttulas forte ex gasometro superfusas.
- f) filum metallicum cum fune ad elevandum gasometrum, se id repleri opus est.
- gg ll) tubuli Caleio chlorato impleti.

- hh) Apparatus Kali caustico liquido ripleti auctore Liebig (pensati).
- ii kk) tubuli Kali causticum siccum continentis (pensati).
- m) tubulus vitreus ad aquae statum indicandum destinatus scala in litra distributa praeditus.
- n) locus quo spatum externum gasometri oleo repleti superne cum cavea conexum habet.